

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. इस बरे दी सलाना श्री अमरनाथे दी यात्रा 29 जून गी शुरू होग।
2. चुनां आयोग नै कश्मीरी विस्थापते दे मतदान सरबंधी स्कीम च तरमीम कीती। विस्थापत कैपे लेई 22 विशेष मतदान केन्द्र "एम" फार्म भरने दी बी लोड नेई।
3. लोकसभा चुनां दे पैहले गेड़ लेई प्रचार तेज, बक्ख-बक्ख पार्टिएं दे लीडर अपने मेदवारें दे हक्कै च प्रचार करा करदे न। रक्षामंत्री अज्ज बसोहली च ते गृहमंत्री अमित शाह कल बीजेपी लेई ते कांग्रेस पार्टी लेई सचिन पायलट कल कटुआ च प्रचार करगंन।
4. मौसम विभाग नै जम्मू कश्मीर समेत उत्तर पच्छिम भारत दे केई हिस्से च गर्जी चमकियै बरखा बरने, ऐन गड़ा पौने ते अंधी झक्खड़ चलने दी पेशगोई कीती ऐ।

<><><><><><>

Amarnath Yatra

सालाना श्री अमरनाथ यात्रा इस बरे 29 जून गी शुरू होग ते 19 अगस्त गी श्रावन पूर्णिमा यानि गी रक्खड़ पुन्नेआ आले दिन संपन्न होई जाग। श्री अमरनाथ श्राईन बोर्ड आस्सेआ इस सरबंधे च इक ब्यान जारी कीता गेआ जे एह यात्रा 29 जून गी शुरू होग ते 19 अगस्त गी संपन्न होई जाग। उपराज्यपाल मनोज सिन्हा होर इस बोर्ड दे अध्यक्ष बी ऐन। 52 दिनै तगर चलने आली इस यात्रा लेई पंजीकरण बक्ख-बक्ख बैंके दी 540 शाखाएं च अज्जै थमां शुरू होई जाग। जम्मू कश्मीर बैंक पंजाब नैशनल बैंक, स्टेट बैंक ऑफ इंडिया ते यैस बैंक दी शाखाएं च अज्जै थमां श्री अमरनाथ यात्रा लेई पंजीकरण शुरू होई जाग। यात्रा दरान 13 बरे थमां घट्ट दी बरेस आले न्याणें ते 70 बरे थमां बद्ध उमरी आले बुर्जुग ते 6 महीने दी पटेयाली महिलाएं गी यात्रा पर जाने दी इजाजत नेई होग। सेहत सरबंधी प्रमाणपत्र लेई जम्मू कश्मीर दे 20एं जिलें च 230 डाक्टरें प्रमाणपत्र सरबंधी इख्तोयार दित्ता गेआ ऐ।

<><><><><><>

नराते शुरु होने थमां लेइयै अजे तगर ढाई लक्ख थमां बद्ध श्रद्धालुएं श्री माता वैष्णो देवी जी दी पवित्र गुफा च मत्था टेकेआ ऐ। श्राईन बोर्ड दे अधिकारिएं मूजब एह रश मेद ऐ जे नौमी तोड़ी तारी रौहग। श्राईन बोर्ड नै नराते दरान बड़े मते रश गी दिक्खदे होई लोड़चदे इंतजाम कीते दे न। हर रोज करीबन 40 ज्हार थमां 50 ज्हार श्रद्धालु कटरा पुज्जारदे न।

<><><><><><>

EC-Migrants

चुनां आयोग नै कश्मीर विस्थापतें लेई स्कीम च अददे—दुब्बे तौरा पर तरमीम कीती ऐ। एह तरमीम लोकसभा चुनाएं दरान कश्मीर विस्थापतें लेई कायम शिविरें च वोट पाने ते डाक राएं मत अधिकार दा इस्तेमाल करने बारे ऐ। हुन उनें गी पैहले आला लेखा एम—फार्म भरने दी लोड़ नेई होग ते ओह सिद्दे अपने मतदान केन्द्र च जाइयै अपना नां दिक्खी सकदे न ते वोट करी सकदे न। स्कीम च कीती गेदी तरमीम मूजब 22 विशेष मतदान केन्द्र जिंदे चा 21 जम्मू च ते इक उधमपुर च ऐ, ओ इस चाल्ली बनाए जांगन तां जे हर जोन च इक मतदान केन्द्र जरूर होए। राहत ते आबादकारी मैहकमे दे दफतरै मूजब उपलब्ध ओकड़े दे आधार पर मसौदा तैआर कीता गेआ ऐ, इस्सै आधार पर मतदाता सूचियां बनाइयां गेइयां न। एह एआरओ माइग्रेंट जम्मू, उधमपुर, जोन दफतीत्रर च उपलब्ध न। एहदे इलावा एह वैबसाईट www.jkmigrantrekief.nic.in पर बी उपलब्ध न।

<><><><><><>

Voter Are Glad

सबै योग्य मतदाता वोट पाने दे अपने अधिकार दा इस्तेमाल जरूर करन, इस गल्लै गी जकीनी बनाने लेई जिला प्रशासन कठुआ ने बर्जुग नागरिक यानि एवीएससी श्रेणी, दिव्यांगजन जां एवीसीओ श्रेणी तैहत डाकै राएं वोट पाने दा विकल्प उपलब्ध कराया ऐ। इस पैहले दा मकसद विशेष जरूरतें आले इनें श्रेणिएं दे लोकें दा मतदान जकीनी बनाना ऐ। कठुआ जिले च अजे तोड़ी 44 लोकें डाकै राएं वोट पाने दा विकल्प चुनेआ ऐ ते मतदान टीमां घर—घर जाइयै उंदे कोला वोट पोआ करदियां न ते एह प्रक्रिया कल बी जारी रौहग। इस सुविधा लेई लोक जियां प्रशासन ते चुनां आयोग दा आभार जता करदे न।

<><><><><><>

Poonch Army

सेना आस्सेआ दूर दरेड़े इलाकें च रौहने आले लोकें तगर पुज्ज बनाने, उनेंगी बक्ख—बक्ख बमारिएं प्रति जागरूक करने, उंदे लक्ष्णें बारे दस्सने, बमारिएं थमां रोकथाम ते सरबंधी जानकारी लेई पुंछ जिले च इक मैडिकल शिविर लाया गेआ। भारतीय सेना दे डाक्टरें जरूरतमंद लोकें दी मुफ्त सेहत सरबंधी जांच कीती ते

उनेंगी दोआइयां बी दित्तियां, सेहतमंद खान-पान, सतधार-खुराक, निजी सेहत सरबंधी सफाई, स्वच्छता संतुलित आहार बारे इक लैक्चर बी दित्ता गोआ। इसी लेइयै आम लोकें च खासा उत्साह दिक्खने गी लब्धा, सेना दे इस जतन लेई लेई आम लोकें बड़ी मती सराहना कीती।

<><><><><><>

Campaign-Jammu

लोकसभा चुनां दे पैहले गेड़ लेई प्रचार अभियान होर बी तेज होई गोआ ऐ। बक्ख-बक्ख सियासी पार्टिं दे नेता अपने अपने मेदवार दे समर्थन च रैलियां करा'रदे न। केन्द्री गृहमंत्री अमित शाह होर जम्मू दी पलोड़ा थाहर मन्हास बरादरी आले मैदान च रैल करगंन। जिसलै कि कांग्रेस दे स्टार प्रचारक सचिन पायलट होर 16 अप्रैल गी कठुआ च रैली करगंन। पैहले गेड़ च जम्मू कश्मीर दी उधमपुर लोकसभा सीट लेई 19 अप्रैल गी वोट पाए जाने न। दुए गेड़ तैहत जम्मू पार्लिमानी हल्के लेई 26 अप्रैल गी वोट पाए जाने न। रक्षामंत्री राजनाथ सिंह होर अज्ज कठुआ जिले दी बसोहली थाहर इक बड्डी रैली गी संबोधत करगंन। एह रैली बीजेपी दे उधमपुर लोकसभा सीट लेई मेदवार डॉ. जितेन्द्र सिंह हुंदे समर्थन च होआ'रदी ऐ। ऐसा मन्नेआ जा'रदा ऐ जे बसोहली च कांग्रेस दे मेदवार चौधरी लाल सिंह होर बड़े मते लोक प्रिय न। ओह इस विधानसभा हल्के थमां त्रै बारी विधायक बी रेई चुके दे न। एहदे थमां पैहले प्रधानमंत्री नरेन्द्र मोदी ते उत्तर प्रदेश दे मुखमंत्री योगी आदित्यनाथ होरें बी उधमपुर ते कठुआ जिलें च रैलियां कीतियां हियां।

<><><><><><>

Kathua Campaigning

केन्द्री मंत्री ते उधमपुर-डोडा-कठुआ लोकसभा हल्के थमां बीजेपी दे मेदवार डॉ. जितेन्द्र सिंह होरें आक्खेआ ऐ जे सरकार नै थेआरबंद बलें गी कम्म करने दी खुल्ली छूट दित्ती दी ऐ जेहदे नै ना शड़ा साढे बलें दा मनोबल बधेआ ऐ सगुआं मुल्खै दी सुरक्षा ते मजबूती लेई बी बेहतर नतीजे सामने आए न। अंतर्राष्ट्रीय बन्ने कन्नै लगदे कठुआ जिले च कल बक्ख-बक्ख थाहरें जनसभाएं गी संबोधत करदे होई डॉ. सिंह होरें आक्खेआ जे कश्मीर घाटी च हून जन्नी बट्टे मारने दी कोई घटना पेश नेई औंदी ते अंतर्राष्ट्रीय बन्ने कन्नै लगदे इलाकें च रौहने आले लोकें गी बी हुन बन्ने पारा गोलीबारी कारण घड़ी मुड़ी अपना घर-बाहर छोड़िये पंचैत घरें, स्कूलें जां होरने सुरक्षत थाहरें आसरमा लैने दी लोड़ नेई पौंदी ऐ। डॉ. सिंह होरें आक्खेआ जे इस मसले दा नबेड़ा मोदी सरकार नै हर घरै च बंकर बनोआइयै कीता ऐ।

<><><><><><>

Azad Campaign

डैमोक्रेटिव प्रोग्रेसिव अजाद पार्टी दे अध्यक्ष गुलाम नबी आजाद होरें कल डोडा जिले दे भलेसा च इक जनसभा गी संबोधत करदे होई सियासी पाट्रिएं दी सख्त नुक्ताचीनी करदे होई आक्खेआ जे ओ लोकें गी गुमराह करा करदियां न, टकोहदा करियै ओ जिंदे नेताएं दा इतिहास शक्क शुबे आला रेहा ऐ। उधमपुर लोकसभा सीट लेई अपनी पार्टी दे मेदवार जी.एम.सरूरी हुंदे लेई चुनां प्रचार करदे होई आजाद होरें होरनें पार्टिएं गी पुच्छेआ जे उनें इलाकें दे लोकें लेई केहड़ा खरा कम्म कीता ऐ। बिजन कोई ठोस फायदा पजाए दे शड़ा गुमराह करने दे इलावा। डीपीएपी दे अध्यक्ष होरें अगगे आक्खेआ जे इलाके दे लोकें, समाज च बंड पोआने दिएं तगड़िएं कोश्टें दे बावजूद बी, इनें सारिएं साजशें गी नकारी दित्ता हा। आजाद होरें मेद प्रगट कीती जे चिनाह वादी दे लोक इक बारी परतियै लोकें बश्कार बंड पोआने आली सियासत गी औंदे चुनाएं च खारज करी देंगन।

<><><><><><>

Omar Abdullah Campaign

डोडा उधमपुर कटुआ लोकसभा सीट लेई आईएनडीआई गठबंधन दे मेदवार चौधरी लाल सिंह हुंदे हक्के च समर्थन दी अपील ते प्रचार करदे होई साबका मुख्मन्त्री ते नैशन कांफ्रेंस दे उप-प्रधान उमर अब्दुल्ला ते नैशनल कांफ्रेंस ते कांग्रेस दे केई लीडरें कल बनिहाल दे बक्ख-बक्ख इलाकें च जनसभाएं गी संबोधत कीता। उमर अब्दुल्ला होरें आक्खेआ जे लोक मजूदा सरकार दे कथित भ्रष्टाचार लुट्ट-खसूट ते माड़ शासन कोला दुखी होई चुकी दी ऐ। उनें आक्खेआ जे केन्द्र च बैठी दी सरकारै जम्मू कश्मीर दे लोकें कन्नै बड्डे-बड्डे वायदे कीते हे पर जमीनी हकीकत भलेया बक्खरी ऐ, लोकें गी किश बी हासल नेई होआ सिवाए मायूसी दे।

<><><><><><>

Lal Singh

साबका सांसद ते कटुआ उधमपुर लोकसभा हल्के थमां कांग्रेस दे मेदवार चौधरी लाल सिंह होरें आक्खेआ ऐ जे ओ चुनां जित्ते दे न तां मकामी लोक उंदी पैहली तरजीह होंगन। कल डोडा ते उधमपुर जिले च बक्ख-बक्ख थाहरें चुनां रेलिएं गी संबोधत करदे होई उनें बीजेपी पर त्रिक्खा हमला करदे होई आक्खेआ जे एह पार्टी आम लोकें दे हक्कै च कदें किश नेई आक्खदी जेहड़े पिछड़े इक दहाके थमां इंदी मनमर्जी दा खमयाजा भुगता करदी ऐ। लाल सिंह होरें आक्खेआ जे सरकारै लोकें दियां शकैतां सुनने लेई ग्रीवेंस सेल्ल जरूर बनाए दा ऐ पर इक बी शकैत दा नबेड़ा नेई कीता गेआ। उनें दोष लाया जे बीजेपी दे नेताएं च बड़ी आकड़ ऐ ते ओ अपने अपने इलाके दे लोकें कोला बी छिंडा बनाइयै रखदे न। लाल सिंह होरें लोकें अगगे अपील कीती जे ओ उनेंगी वोट देइयै कामयाब बनान।

<><><><><><>

Weather

भारती मौसम विभाग नै अगले 24एं घैंटे दरान जम्मू कश्मीर सनें उत्तर पच्छमी भारत च बरखा, अंधी झक्खड़, बिजली चमकने दी पेशगोई कीती ऐ। मौसम विभाग मूजब जम्मू कश्मीर, लद्दाख, गिलगित, बल्तीस्तान, मुज्जफराबाद, हिमाचल प्रदेश ते उत्तराखंड च अज्ज हल्के थमां दरमेयाने दर्जे दी बरखा, भारती मौसम विभाग नै आक्खेआ ऐ जे जम्मू कश्मीर, गिलगित, बल्तीस्तान, मुज्जफराबाद, हिमाचल प्रदेश ते उत्तराखंड च अज्ज हल्के थमां दरमेयाने दर्जे दी बरखा, अंधी-झक्खड़ चलने, बिजली चमकने दे कन्नोकन्नी 40 किलोमीटर फही घैंटे दी रफतार कन्नै ब्हाऊ दे चलने दी शैका जताई ऐ। जम्मू खित्ते, हिमाचल प्रदेश ते उत्तराखंड दी किश थाह्रें पर ऐन'गड़ा पौने दी बी संभावना जताई गई ऐ।

<><><><><><>